



Urwego Mpuzamahanga Rwashyiriweho Gukora Imirimo y'Insigirira y'Inkiko Mpanabyaha ("IRMCT") rwashyizweho n'Inama Ishinzwe Amahoro ku Isi y'Umuryango w'Abibumbye ku itariki ya 22 Ukuboza 2010 kugira ngo Urukiko Mpanabyaha Mpuzamahanga Rwashyiriweho u Rwanda (TPIR) n'Urukiko Mpanabyaha Mpuzamahanga Rwashyiriweho icyahozeho ari Yugosilaviya (TPIY) nizimara kurangiza manda yazo ruzazisimbure ku byerekeranye n'ububasha, imirimo y'ingenzi, uburenganzira n'inshingano zari zifite.

IFISHE Y'AMAKURU KU RUBANZA

Kugeza ubu, abantu umunani barezwe na TPIR kubera uruhare rwabo muri jenocide yo mu Rwanda mu mwaka wa 1994 ntibarafatwa. Hateganyijwe ko IRMCT izaburanisha abaregwa batatu bakurikira: Augustin Bizimana, Félicien Kabuga na Protais Mpiranya. Abandi batanu ari bo Fulgence Kayishema, Charles Sikubwabo, Aloys Ndimbatzi, Ryandikayo na Phénéas Munyarugarama, imanza zabo zoherejwe mu Rwanda. Ladislav Ntaganzwa, na we washakishwaga kandi urubanza rwe rukaba rwaroherejwe mu Rwanda, yafatiwe muri Kongo ku itariki ya 9 Ukuboza 2015.

MICT-12-09

USHAKISHWA - PHÉNÉAS MUNYARUGARAMA



Phénéas Munyarugarama yari afite ipeti rya Riyetona Koroneri mu ngabo z'u Rwanda ("FAR"). Hagati y'intangiriro z'umwaka wa 1993 n'itariki ya 14 Gicurasi 1994, ni we musirikare wari ufite ipeti ryo hejuru kurusha abandi mu karere ka Bugesera, Perefegitura ya Kigali-Ngari, ari na komanda w'ikigo cya gisirikare cya Gako.

Umwaka yavutsemo
n'aho yavukiye

1 Mutarama 1948, Komine ya Kidaho, Perefegitura ya Ruhengeri, Rwanda

Inyandiko y'ibirego

Inyandiko y'ibirego igenderwaho yatanze ku itariki ya 13 Kamena 2012

Aho urubanza rugeze

Arashakishwa kuva ku itariki ya 4 Werurwe 2002

AMAKURU Y'IBANZE KU RUBANZA

INYANDIKO Y'IBIREGO

Phénéas Munyarugarama yarezwe muri TPIR icyaha cya jenocide, ubwumvikane bugamije gukora jenocide, guhamagarira abantu mu buryo butaziguye kandi mu ruhamwe gukora jenocide n'ibyaha byibasiye inyokomuntu, byakorewe muri Perefegitura ya Kigali-Ngari mu Rwanda hagati ya Mata na Gicurasi 1994. Muri icyo gihe, Munyarugarama yari afite ipeti rya Riyetona Koroneri mu ngabo z'u Rwanda ni we musirikare wari ufite ipeti ryo hejuru kurusha abandi mu karere ka Bugesera, Perefegitura ya Kigali-Ngari, akaba na komanda w'ikigo cya gisirikare cya Gako.

Mu Nyandiko y'ibirego havugwa ko abarezerivise bagera ku icumi bazanywe mu kigo cya Gako ku itariki ya 10 Mata 1994, aho ku mabwiriza ya Munyarugarama bahawe intwari zivuye mu bubiko bw'intwari bwo mu kigo cya Gako, kugira ngo bagirire nabi Abatutsi kandi babice. Hanavugwa kandi ko abo barezerivise baje gukoresha izo ntware, bagendeye ku mugambi no ku mabwiriza bya Munyarugarama, aboheje, abashishikaje kandi abateye inkunga kugira ngo bagirire nabi cyangwa bice Abatutsi mu karere ka Bugesera, harimo no ku mabariyeri nk'iyi kuri santere ya Gahembe (Segiteri ya Maranyundo, Komine ya Kanzenze), kuri kiriziya ya Nyamata ku itariki ya 15 Mata 1994 cyangwa hafi yayo no mu bikorwa byo guhiga Abatutsi muri Segiteri ya Maranyundo hagati y'itariki ya 15 n'ya 20 Mata 1994.

Mu Nyandiko y'ibirego havugwa ko, hagati y'itariki ya 10 Mata n'ya 15 Gicurasi 1994, abantu bagabaga ibitero barimo abasirikare benshi bo mu kigo cya Gako, abajandarume, Interahamwe n'abasivire b'Abahutu bitwaje imbunda, amagerenade



n'imihoro, bagenderaga ku mugambi wa Munyarugarama no ku bindi bintu birimo amabwiriza ye, kuboshya, kubashishikaza no kubatera inkunga, bagabye igitero simusiga ku Batutsi babarirwaga mu bihumbi bari bahungiyeye ahantu hatandukanye harimo ibiro bya Komine ya Kanzenze muri Segiteri ya Nyamata, kiriziya gaturika ya Nyamata muri Segiteri ya Kanazi, Komine ya Kanzenze, kuri kiriziya gaturika ya Ntarama., Segiteri ya Ntarama, Komine ya Kanzenze, ku mashuri abanza ya Cyugaro no mu bishanga bya Ntarama. Mu Nyandiko y'ibirego havugwa ko bamwe mu Batutsi babarirwa mu bihumbi bishwe abandi bagakomeretswa.

Mu Nyandiko y'ibirego havugwa kandi ko, hagati y'itariki ya 8 Mata 1994 n'ya 15 Mata 1994, Munyarugarama, afatanyije n'abandi bantu, yohereje abasirikare bo mu kigo cya Gako, ndetse n'Interahamwe n'abasivire b'Abahutu mu bihe bimwe, gukomeretsa no kwica Abatutsi bari bahungiyeye ahantu hatandukanye mu karere ka Bugesera, hamwe muri aho akaba ari mu mugwi wa Nyamata, mu kabare kamwe ko kuri santere y'ubucuruzi ya Gahembe muri Serire ya Muyange, ku Ishuri ry'ubumenyi n'ubuhinzi ryari muri Segiteri ya Mwendo, ku gasozi ka Kayumba, ku gasozi ka Rebero, ku biro bya Superefe wa Nyamata no ku bitaro bya Nyamata, kugira ngo basahure imitungo y'Abatutsi.

Mu Nyandiko y'ibirego, ashinjwa ibyaha bivugwa mu birego bikurikira:

Ikirego kimwe cya Jenocide (Ikirego cya 1)

Ikirego kimwe cy'Ubwumvikane bugamije gukora jenocide (Ikirego cya 2)

Ikirego kimwe cyo Guhamagarira abantu mu buryo butaziguye kandi mu ruhame gukora jenocide (Ikirego cya 3)

Ibirego bine by'ibyaha byibasiye inyokomuntu

- Itsembatsemba (Ikirego cya 4)
- Ubuhotozi (Ikirego cya 5)
- Gutoteza (Ikirego cya 6)
- Gusambanya ku gahato (Ikirego cya 7)

KWIMURIRA URUBANZA MU RWANDA

Ku itariki ya 28 Kamena 2012, Urugereko rwa TPIR rwaburanishije ibyerekeranye no kwimura urubanza rwa Phénéas Munyarugarama rwategetse ko urubanza rwimurirwa muri Repubulika y'u Rwanda.

Ku itariki ya 7 Gicurasi 2014, Umucamanza umwe rukumbi, Vagn Joensen, yasohoye urwandiko rwo gufata Munyarugarama n'itegeko ryo kumwimura bisaba ibihugu byose bigize Umuryango w'Abibumbye kumushakisha, kumufata no kumushyikiriza Ubushinjacyaha Bukuru bwa Repubulika y'u Rwanda.

Nk'uko biteganywa mu Cyemezo cya 1966 (2010) cy'Inama Ishinzwe Amahoro ku Isi y'Umuryango w'Abibumbye, ibihugu byose bifite inshingano yo gufatanya na IRMCT mu gushakisha abaregwa bagishakishwa, kubafata, kubafunga, kubimura no kubashyikiriza inkiko zigomba kubaburanisha.

Ukeneye amakuru arambuye kurushaho wasura urubuga rwa interinete rwa IRMCT www.irmct.org.

Ibibazo by'itangazamakuru byoherezwa kuri imeyiri mict-press@un.org.